

秋

得謚名臣傳 卷四



八旗通志初集卷之一百八十八
名臣列傳四十八

鑲黃旗漢軍得諡大臣

趙廷臣

高天爵

高其位

郎廷極

楊長春

正黃旗漢軍得諡大臣

吳景道

金世德

左夢庚

耿昭忠



耿聚忠

白清額

周全斌

田文鏡

正白旗漢軍得謚大臣

蔡良

魏經國

正紅旗漢軍得謚大臣

劉秉權

阿爾泰

趙廷臣。漢軍鑲黃旗人。初為江南江寧府同知。

治行最著。順治九年。經畧洪承疇督師入楚。題

授分巡下湖南。兵備道按察司副使。時士馬雲

集徵調煩苦。守令多避匿。廷臣一身任之。纖悉

皆經心手。緩急立應。遇刑獄必極意平反。多所

全活。嘗秉燭治文書。曉起百函並發。左右不得

行私。而百姓被澤。十五年。從大兵平定貴州。秋

九月。

特命巡撫貴州。時兵荒之後。民無生理。下車日。延見父

老博採旁咨盡得民間疾苦狀凡所條禁措置
悉洞幽隱定賦蠲賑勸農興學禁貪橫嚴騷擾
殘黎如出湯火貴州苗多民少風教未開喪亂
之後絃誦衰息廷臣謂欲教黔民宜先教土司
苗獮因疏請立定教法言貴州古稱鬼方自大
路城市外四顧皆苗其貴陽以東苗爲夥而銅
苗九股爲悍其次曰狚狚曰狚獠曰八番子曰
土人曰洞人蠻人曰冉家蠻皆黔東苗屬也自
貴陽而西羅羅爲夥而黑羅爲悍其次曰仲家

曰宋家曰蔡家曰龍家曰白羅皆黔西苗屬也
雖種數不同要皆專事鬪殺父子兄弟相與羣
處不講孝弟忠信絕先王禮義之教尚強凌衆
暴之習其來舊矣故馭苗者往往急則用威威
激而叛緩則用恩恩濫而驕稽古舜用干羽漢
武封夜郎武侯縱孟獲非故寬之也皆有深意
存焉蓋教化無不可施之地而風俗無不可移
之鄉也即如苗性至詐而可以信孚苗性至貪
而可以廉感其作梗衝路宜倣保甲之規其讐

殺抄劫宜立鵬勅之法。又賞罰之條必信。餽送之陋必革。凡此皆臣所當悉心力行。不敢贅陳。惟是

聖主創闢大一統之業。開億萬年文明之休。乘此遐荒。開闢之初。首明教化。以端本始。其大者莫如作養世祿。今後土官應襲年十三以上者。令入學習禮。由儒學起送承襲。其族屬子弟願入學者。聽補廩科貢。與漢民一體仕進。使明知禮義之爲利。則儒教日興。而悍俗漸變矣。又莫如預制

土官。夫土官私相傳接。支系不明。爭奪由起。爭奪不已。釀成變亂。今後每遇歲終。令土官各上其世系履歷。及有無嗣子。開報布政司。三年當入

覲。則預上其籍於部。其起送襲替時。有爭襲奏擾者。按籍立辯。斯方策既明。而釁端預杜矣。此點省馭苗根本之圖。折衝樽俎之計。倘蒙

聖主誕敷文德。廣示教化。使土屬入學習禮。得與幫補科貢。土官按籍襲替。不致爭土奪職。庶乎風俗

丕變。遠邇苗民共沾。

王化無疆。矢疏入奉。

旨下部議覆准行。而風教爲之漸開。尋陞雲貴總督。時逆賊馮天裕等竄伏山寨。勾結亡命。犯湄潭。嗣犯甕安。遂調思南等處官兵。擊破賊營。斬天裕。及僞總兵冉宗孝等。餘黨悉平。十八年。以勦土酋龍吉兆功。加兵部尚書。是年調浙閩總督。康熙元年。以督墾荒田功。加太子少保。在任寬和端靜。以度量勝。不爲赫赫名。而人自信服。時僞

魯王餘黨在浙江海洋者尚多。廷臣疏言逆渠張煌言盤踞浙海多年。其下僞官節次招降。獨煌言抗不就撫。廷臣與京口將軍劉之源先後發書遣使諭以禍福。勸其去逆。効順。張煌言之死不悔。雖將隨從兵弁船隻起發進關。猶惜名歸隱。徜徉海外三年。廷臣親赴定海。會商水陸提督哈爾庫。張杰。分遣將士。配坐船隻。由寧台溫三路出洋搜勦。毀其巢穴。殲其餘黨。偵知張煌言披緇遠遁。密令驍勇將備徐元。張公干。扮

成僧民隨帶健丁火器潛伏普陀山一帶仍撥將弁扼守要路以防奔竄至七月二十日瞭望朱家尖有趕繒船急舉火器前擊獲有活口林生陳滿等知煌言見在懸山范舉徐元等即駕所獲賊艘尾隨八槳兵船令活口林生等仍扮差回原船使之不疑乘夜進一小港從山後覓路突入帳房遂擒煌言及其親信餘黨搜出偽視師兵部銀方印一顆偽關防九顆鎗礮盜甲旗傘等物以百折不回三省出沒之渠逆一旦

生擒經過寧紹杭各府百姓聚觀如堵從此奸宄絕望海宇肅清共仰

天威震疊奏入

聖祖深嘉之四年以八旗逃人事多株連停留之家亦

有誤犯言駐防滿洲各旗家僕有新經收買未及逾年者聲音裝束與本地居民無異賣身之時親朋里甲不得而知一旦逃回原籍之人留宿留飯事發牽連似屬可憫嗣後駐防旗下凡收買新人地方官驗契印照仍出示曉諭本縣

地方俾知某人賣身旗下不許容留倘後逃走
有人窩藏查係報部有檔與已賣一年已上者
照例究罪如未經報部有檔並未及一年者分
別酌議下所司知之時海宇初定官民流寓者
多遠地戶口多耗因嚴廢官回籍之令而廢官
子孫多有流離不能回籍者廷臣疏言革職解
任各官本身現在者應照例催回原籍其官員
已故子孫或願留住任所及士民遷移他處丁
口土田已附入他處版圖者請聽其自便戶部

議覆應如所奏尋得

旨漢軍著速催回旗餘依議時又聞度支不足輒愀然
曰天下有化無用爲有用者錢法是也今二十
四監皆停鼓鑄國用何由而足乎乃拜疏以請
奉

俞旨諸監復鑄泉源貫輸不絕浙中亦賴其利五年招
降福建海寇僞都督李順等八年卒於官
賜祭葬如典禮謚清獻廕一子入監讀書

高天爵字君寵初係漢軍鑲白旗人至于其位

任大學士始改隸鑲黃旗父二等阿達哈哈番
高尚義生天爵居長少讀書慷慨重大義善騎
射能挽強弓年二十三即從征討所至有功順
治四年由歲貢授山東高苑縣知縣時地方初
定盜賊不時竊發有謝千等聚黨二千餘人劫
掠鄉民天爵環甲率數騎馳入賊壘斬首數級
賊懼潛遁距高苑六十里爲博興縣爲賊所陷
天爵夜率衆馳救之賊盡棄其輜重去考滿遷
河南信陽州知州信陽地居衝要民人疲弊天

爵下車加意撫綏凡

王師經過必身親供億闔閭不驚經畧洪承疇知其
才特疏題授湖廣長沙府知府時進征李定國
兵馬雲集長沙天爵綜理糧餉完固城池軍民
賴之父尚義時方以協領駐防杭州病劇天爵
聞信力求解任省親即隨父告病回京十六年
授江西建昌府知府建昌自金聲桓亂後屢經
蹂躪城郭僅存所屬廣昌縣有羊石滴水二砦
賊首王昂傅勝翻天王等率黨萬人竊據之負

固爲患。巡撫張朝璘。今天爵率兵征勦。天爵以計誘斬王昂。傅勝賊衆堅守不出。乃依山立柵爲木城。圍困之。期年盡獲餘黨。斬翻天王等渠魁數十人。餘悉安插爲民。所掠男女悉召其親屬領以歸。牲畜給與貧民。因赭山斷險以絕後患。事聞以軍功加一級。十七年父病歿。請歸治喪。督撫以需人之際。國事爲重。文章題請畱任守制。天爵在建昌十餘年。起敝除困。補葺瘡痍。凡有益於民者。政無不舉。十三年春逆藩耿精

忠據福建反。賊兵出江西首攻建昌。城中武弁等皆陰從賊。天爵知不可爲。乃與其子訣曰。我爲

朝廷守土有死無二。汝奉母去。勿我累也。賊兵萬衆奄至城守。兵悉已應賊。天爵獨據鞍上馬。率家奴數十人。據萬年橋死鬪。賊不能越橋。同城守將趙印從後攻天爵。遂執以獻賊。載送入閩。耿逆誘之降。不從。拘守獄中。覲其改節。天爵仍陰結死士。聯屬同心。密請大兵進關。内外接應。方

尅期舉事。謀泄被害。罵賊而死。方陷賊時。已遷江南兩淮鹽運使。未行而賊兵至。或謂君已別遷。宜速行。不必與此難。天爵慨然曰。吾守此土十六年。當殉此城。乃竟如所言。既死奉

旨。贈太僕寺卿。謚忠烈。復

諭閩省建九忠祠。與同時殉節諸臣。春秋祭享。建昌府廣昌縣俱崇祀。名宦祠。雍正四年。以子其位累官至大學士。其佩累官都統兼刑部侍郎。復奉

特恩。加贈禮部尚書。

高其位。字宜之。號蘊園。康熙九年。以父天爵廕補鑲白旗筆帖式。陞佐領。十三年。吳三桂反。其位隨寧南靖寇大將軍多羅順承郡王勒爾錦出征湖廣。委署軍營叅領。駐襄陽。率二十騎往探賊兵虛實。時賊將王惠率兵二萬潛越南漳縣。直趨襄陽。至土地嶺。與之遇。即令飛騎馳報襄陽。而自率所部突入賊隊。衆皆辟易。馳至南漳城下。躍濠而過。呼守城者戒嚴。所率二十騎傷者僅數人。自視遍體皆血。鎧甲之色模糊莫

辨城中人方知賊兵已過南漳。急爲守禦。而我軍在襄陽者。聞報有備。賊不敢前。乃回犯南漳。圍城三日。亦以有備得不陷。援兵至。賊遂解去。又叛賊譚洪率舟師三萬犯鄖陽。其位以百人扼楊谿鋪。踞崖射賊。矢無虛發。賊舉火器多中崖壁。或自肩背過。相持七十餘日。不傷一卒。糧盡。煮馬韃以食。會副都統李林隆率兵至。大敗之。後每逢賊至。爭先奮力。用卒少而成功多。前後共得功牌二十九年。奉

旨調回京師。緣南漳之役。都統范達禮。誤以敗遁聞部。議盡銷所得功牌。仍落職。二十七年。復選爲火器營操練尉。隨

聖祖仁皇帝出口外。至拜查地方。復往歸化城。二十八年。承襲二等阿達哈哈番。二十九年七月。隨撫遠大將軍裕親王福全。出口在烏闌布通地方。遇厄魯特噶爾丹。擊敗賊衆。攻取駱駝營。以頭等功補授叅領。三十五年。隨

聖祖征厄魯特。直抵公噶爾圖地方。凱旋。三十八年。棟

選廣東副將。甘肅提督雷繼尊保奏高其位深
可信任得。

旨隨赴甘州。遇副將員缺用。尋補涼州永昌副將。永昌
爲邊陲要地。其位申明法令。修築堡塞。防守嚴
密。外藩部落不敢牧馬長城外。有墨爾根代青
者。藉擇地養疾爲名。闖入邊境。一日擁衆萬餘
奄至。其位率百騎遙語之曰。邊牆內外有界。非
奉

旨不得輒入。汝不俟

君命無故前來。其位有守邊之責。請即決戰。代青知不
可撼。遂巡退去。在任八載。邊境肅清。四十八年。
陞襄陽總兵官。是時襄陽營務廢弛。兵多缺額。
其位蒞任後。力加整頓。暮年弊除。政舉。士馬飽
騰。五十二年。陞湖廣提督。恭遇

聖祖六十萬壽。廕一子。五十三年。

賜孔雀翎。鞍馬弓矢。索韉。時策妄阿拉布坦背逆。命二
子先後赴陝。効力。六十一年。調任江南提督。以
兩耳重聽。具疏求解職。不允。

欽賜御書一幅書扇一柄

命署兩江總督事十一月

世宗憲皇帝登極欽賜

聖祖遺物五件又廕一子雍正元年進謁

聖祖梓宮

世宗以其位兩朝舊臣慰問備至旋返江南任時大江

南北營汛遼遠其位躬親訓練整飭多方在任

時盜賊屏跡三年

特陞文淵閣大學士加太子少傅兼禮部尚書懇辭不

允先是其位佐軍襄陽聞父殉節哀號憤激三年無笑容及逆賊既平

聖祖贈官予廕

諭賜祭葬以其位與弟其佩久在外任未得舉行至是

入居內閣其佩亦爲都統乃上

君恩已沛子道猶虧一疏備陳始末具奏奉

旨高其位等爲伊父奏請賜卹甚是高天爵捐軀盡忠

大節可嘉著給予禮部尚書職銜追賜卹典至八旗

各省有似此被難而未獲恩卹者俱著詳察具奏四

年十月初八日。八十生辰先二日。

特命文武大臣俱往稱慶。

賜白金千兩爲酒食具。至日復

遣內大臣賚

賜御書匾額對聯及尚方食用諸物十一月以老病再

疏乞休得

旨。卿効力年久恪慎奉職老成練達茂著賢聲是以簡
預機務用昭優眷前以老病乞休朕未忍俞允特命
供職數時以示眷念耆舊大臣之至意今卿復行奏

請情詞懇切准以原官致仕五年正月病卒。

特遣親王大臣往奠茶酒

予祭葬如典禮諡曰文恪

郎廷樞字紫衡漢軍鑲黃旗人山東巡撫永清

次子也初習舉子業康熙十五年以三藩之亂

停止八旗科舉十九年由廕生補江寧府理事

同知山西于成龍爲兩江總督稱其才特加委

任曰他日此座屬子矣二十三年陞雲南順寧

府知府二十五年計典卓異陞長蘆鹽運使時

鹽政冗弊。賄賂公行。商人行鹽地方。各有一定州縣。謂之鹽窩。凡以賄求運使。奪他人鹽窩者。曰批地方。以賄保守自己鹽窩者。曰不批地方。往往因賄虧課。廷極至。一切禁止。詳請巡鹽御史。永革其弊。尋以母憂去。三十一年。服闋。補浙江鹽運使。三十六年。陞登萊青道。

聖祖仁皇帝南巡。嘉其績。

御書振鷺初飛匾額賜之。三十九年。陞福建按察使。四十年。陞浙江布政使。列狀請甦白糧積困。又捐

修海塘。巡撫趙申喬深倚任之。四十四年。

聖祖巡幸浙江。特諭廷臣云。浙江布政使郎廷樞。人才優長。令署理江西巡撫事。五月赴任。正己率屬息事寧人。民以大和。尋實授巡撫。益加意整飭。凡有司收糧火耗。斛面幫費等弊。釐剔殆盡。清理鹽政。限以定價。設立義學。慎重獄情。禁關稅勒索。捐資養高年。育嬰兒。又禁飭各汛駐防兵丁。不得欺凌百姓。四十七年。以買補。四十六年。截畱漕米三十萬石。附搭運通。恐糧艘負載過重。涉

險堪虞。疏請分作三年附運。軍民便之。初江西漕糧。各州縣山高溪淺。糧艘不能就本地起運。納糧之民。每石捐助米五斗三升。爲運丁催駁。船出淺等費。行之已久。三十八年戶部以其近於私派。藉端索費不遂。因奏請停給。併追從前已給之米。漕臣屢疏爭之。部駁不已。廷極上疏力陳。不可言。江省起運漕糧。每正改米一石。給副耗米五斗三升。內四斗聽候過淮盤驗。爲自淮迤北沿途盤剝。及兌交京通二倉。災耗之用。

其餘一斗三升。爲本省開行盤灘剝淺。履湖涉江之費。屢年造入奏冊。報部准銷。在案。自康熙三十八年分漕糧奏銷案內。部駁核減。及後遞年奏銷。俱准部議。比別省浮多。行令核減。茲據旗丁等連名哀籲。疊請免追查江西運道。較之別省遠近不同。各省運道。或由平水。或濱大江。既無淺阻之灘。可省盤剝之費。江西自省開行。即有桃花蚌蛤。鳳凰鸞頸等十餘灘。重以鄱湖三百六十里之波濤。長江千里之險阻。額給五

斗三升尚不敷用。若更核減勢必有悞運務。江浙等省裝米一淺行月折色銀六十餘兩。又本色米六十餘石。江西裝米一淺止有行月銀六十餘兩。少米六十餘石。且江浙耗贈漕截銀米。又已復給。即楚省二耗米石亦蒙

恩旨照舊例行。乃均屬軍旗成供輸輓。止此應給之項。復行核減。情實堪憫。且即將本年應給耗米盡數扣存。亦不足屢年應追之數。而此數十萬之天庾。何能遠運。再查江西有漕州縣。每多僻處山

陬。顧募小艇木筏。逐程盤剝。始克抵省。而上倉下河。扒夫脚夫。又須催募。以及修倉鋪墊。在在需費。里民自願津貼。並非別動正項。敢於違例支給也。業經前督臣范承勳於再陳漕糧脚耗等事案內具

題奉

旨。江西所屬州縣多處山陬。百姓自願貼費。將漕米運至水次。著仍聽民貼運。從前已經支給者。俱免追賠。該部知道。欽遵。在案。乃康熙三十八年。部議以原題

疏內並無船戶扒夫等項銀米。行令分晰開報。繼准逐案駁追。不知脚耗者乃貼運之總名。而修倉鋪墊船戶扒夫等項。即貼運之細數。非貼運之外。又有船脚等費也。况脚夫舟子多屬貧民。原係按日給銀計口授食。迨後死亡遠徙。莫可根尋。是此二項寔屬難追。難減。且每年全給前耗。尚有掛欠正糧。若再議減少。則疲丁力不能支。必掛欠愈重。此盈則彼縮。耗省則糧虧。似非裕。

國恤軍之至計也。至於脚耗銀米。原係百姓自願津貼。以爲運漕。至省諸費。載在全書。經奉

諭旨。聽民貼運。免追復給之項。其難減情形。久在聖明洞鑒之中。均當仰請

聖恩。一併免追。已往准給將來。以廣

皇仁。以資輓運。部臣終以部費不至。駁行如故。明年廷極。仍具疏請。照給免追。以甦軍困。言江右給軍耗米。以及百姓自出津貼脚耗銀米。自康熙三十八年奏銷案內。部議核減。遞年疊追。其難減

苦情。經漕臣彙格三次疏陳，臣亦特疏

題請俱格於部議未邀允准。臣思部臣屢駁減追，固爲慎重錢糧起見。若使果可節省，臣等豈無同心。今日擊運道之情形窮丁之困苦，身在地方，誼難緘默，是以不避冒瀆爲

聖主陳之。如五三耗米，部議以江南等省正兌米每石止給四斗，改兌米每石止給三斗，而江西正改米槩給五斗三升，視爲浮多。故令照減，殊不知江南等省皆係平水內河，江西層層淺阻，俱須

盤剝及達鄱湖，波濤險遠，必借風便而後可行。則守候又需時日。故前人因地制宜，量增耗米，非無因濫給也。且江浙等省給軍行月，皆本折兼支。江西並無本色米石，江南贈銀每石有五米五銀，與五米十銀之分。浙江漕截每石有三錢四分七厘之數，而江西米石止增銀三分米三升，亦皆少於江南浙江。故單舉耗米而言，似覺江西爲多。若統計每船行月贈貼之數，則江西實少。况每年照例全給窮丁抵通，尚有掛欠

今若再議減少必致虧欠愈多。雖以重法繩之究於

國儲何補。且溯查此項於康熙三十四年奉

旨復給。故該年奏銷案內。部覆內開。一支給船脚併修倉鋪墊等項銀二萬四千八百兩一錢零米二萬八千七百二十六石五斗零。已於再陳漕糧等事案內。總督范承勳具題得

旨准行。欽遵在案。此係應給之項。無庸議。是經部議准銷。更益彰明可考。斯時並未嘗以與原題字樣不符。別有駁詰。况自三十八年至今。已經十載。無論經放之官。多半更易。經領之夫。盡已星散。追無可追。即現在徵漕州縣。若無前項諸費。則數十萬漕糧。豈有神術轉運。此脚耗難減之苦情也。仰惟

聖主仁恩。廣被一夫。不遺頻年。蠲租免賦。不惜數百萬金錢。愛民之德。至矣。復還浙省。二五截銀。准給楚省。二耗米石。恤軍之德。至矣。臣用敢仰承德意。於江西軍民。冀邀一視之仁。今兌運屆期。事

在緊急不得不迫切再陳於

聖明之前。倘部臣仍執前議。必著經放之官追賠。則司漕下吏必致畏憚。不給貽悞。

國儲所關非細。伏祈

睿鑒。俯念江西運道不同。諸費實爲繁重。全書之章程可據。

特旨之復給在前。軍民之疾困堪憐。所給實非冒濫。將前項耗米脚耗一并免追。復給俾窮丁輓運。有資百姓貼費無累。則全漕官弁百萬軍民咸沐

聖恩於生生世世矣。仍一面給如故。曰不給則廢運矣。部臣仍前駁追。廷極亦仍前疏請。疏凡三上。

聖祖知其情。部駁不得行。江西運丁至今賴其功云。五十年

特命署理兩江總督事。任事一年。節禮餽送一無所受。五十二年陞漕運總督。廷極明於漕務。至是盡行其法。漕弊剔除殆盡。五十四年正月病卒。遺疏至奉

聖祖特諭云。郎廷極爲總漕。盡心撫恤。人皆感悅。年年

漕船抵通最早糧米並無虧欠回空船隻亦不致凍阻由其實心辦事一切區處得宜也昔桑格任內尚因糧船遲悞不免議處以前總漕未有能及郎廷極者昨聞病故甚為軫恤應得卹典察例具奏尋議覆賜祭葬如典禮謚溫勤江西浙江名宦祠並崇祀焉

楊長春漢軍鑲黃旗人初任佐領康熙四十一年陞京口叅領五十年陞京口將軍標下副將五十九年擢任江西南瑞鎮總兵官雍正二年陞浙江提督四年十二月病卒

賜祭葬如典禮謚勤恪碑文稱其紹美家聲宣勞禁旅既分符於京口夙蒞戎行旋作鎮於江西克嫻武畧遂移旌而臨浙水俾專閫以督海疆奄逝忍聞軫懷良切用頒優謚更勒豐碑云

吳景道漢軍正黃旗人世居奉天廣寧衛天命六年入旗籍由生員考授吏部啟心郎改都察院理事官時睿王專擅景道奮不顧身特疏糾叅王怒矯

旨革職謫戍順治二年起補河南右布政尋擢河南巡

撫兼兵部侍郎。值河北初定，河南五府餘寇未靖。景道多方勸諭，招撫偽帥王良翰等四十餘員，兵十萬餘名。在任首重人才，優禮儒士，輕徭役，除荒稅，平市價，約束兵丁，薦舉賢良，許作梅等皆躋通顯，有名於時。百務舉焉。又修理河道，一塞流通，一塞汴口，一塞荆隆，嚴寒暑雨，必與工役同興息。河患悉平。兼率兵會勦山東曹縣土寇有功，加兵部尚書銜。十年以病乞休奉世祖章皇帝旨，吳景道撫豫多年，清勤素著，允以原官

致仕。仍令馳驛來京。去豫之日，行李蕭然，士民攀轅泣留，聲聞數里。十三年卒。

賜祭葬如典禮。謚愨僖。康熙元年，追贈太子太保，崇祀河南名宦祠。

金世德，字孟求，漢軍正黃旗人。禮部尚書玉和之孫。兵部侍郎維城子也。順治初，以廕補翰林院編修。在內院繙譯秘書。凡有大撰述及機密詔諭，恒午夜馳召之，尋改吏部員外郎，遷兵部職方郎

中。康熙五年奉

命往福建招撫海寇有功擢左通政司叅議旋授都察院僉都御史再陞副都御史八年

聖祖仁皇帝命爲直隸巡撫世德在吏兵二部時精明嚴峻郡邑墨吏聞風震懾到任周咨利弊厲意釐剔然所屬有以紛更進者恐其喜事邀功而實澤不究一切報罷直隸自有明以來不設布政按察二司以近在

京畿事皆統於戶刑二部也然守令無總領之員世德因請設總理錢穀刑名兩監司比於他省

藩臬屬吏便之世德廉靜精敏事無鉅細期於便民畿北四郡兵民錯處請立屯長以治奸匪燕趙舊習健訟罹大辟者衆世德每閱爰書必得其情平反尤多漳水滹沱桑乾諸河洑流秋漲沒民田膏腴爲沙磧者八萬餘畝歲苦徵輸世德屢疏請豁卒獲蠲除十三年以後三藩之亂四方用兵供億繁急州邑不能支世德單騎行營中躬給芻糗兵無橫索市肆晏然十八年十九年連歲大旱民饑請蠲請賑復請截畱漕

米四十餘艘屬邑賴以生全。世德生長閭閻而恭儉性成，鮮嗜好絕苞苴，教屬吏如子弟，以故守令鮮簞簋不飾者。胥吏必用土著，不敢舞文。榮戟常晝閉，出不列儀從，屬官來謁，即嚴寒盛暑，務令盡所欲言。喜讀循吏傳，倦則令人誦之。愛文士，遇士大夫以禮，於人有善，亟稱述之。守己以正，人不敢干以私。累年勤於政事，積瘁成疾，屢請致仕。臺省交章奏留，引汲黯淮陽故事，勉之卧理。

溫旨慰留，再辭不允。世德聞而伏枕感泣，力疾視事。又二載，日就沈頓。十九年春卒於官。五月，部議照

例

予祭葬奉

旨。金世德蒞任以來，實心任事，克盡職掌，著與他謚。許其襯入都門祭葬，如典禮。尋謚曰清惠。保定士民奉其神主祀於學宮。二十一年二月。

聖祖特諭羣臣論直隸巡撫稱世德與于成龍居官有聲名于成龍山西人謚清端者也。

左夢庚。漢軍正黃旗人。明寧南侯良玉之子也。順治元年。良玉由湖廣統兵下南京。以誅馬士英爲名。至九江病歿。夢庚領父衆徘徊江楚之間。二年。英親王阿濟格率兵追流賊至九江。夢庚率領所部總兵十二員。官兵十萬。船二千隻。銀三萬兩。米一萬石迎降。至京。以其衆分隸旗籍。授夢庚一等昂邦章京。世職。四年。擢本旗烏真超哈固山額真。六年。隨英親王征大同。叛鎮姜瓖攻左衛。克之。十年病歿。

賜祭葬如典禮。謚莊敏。子世永襲一等精奇尼哈番。仕至廣西提督。內陞都統。

耿昭忠字信公。漢軍正黃旗人。靖南王繼茂之次子也。年十五入侍。

禁庭。順治十二年。選爲固山貝子。蘇布圖女固山格格之婿。授昭忠固山額駙。尋加授爲和碩額駙。康熙十三年。昭忠兄精忠據福建反。

聖祖仁皇帝遣昭忠宣諭精忠。十五年正月。遇單恩加太子太保。是年精忠降。十二月。帥師往勦海寇。

以耿昭忠爲鎮平將軍。代兄駐守福州。防汎謹
慎。十七年八月。

聖祖特諭兵部。向因靖南王耿精忠勦賊出外。故授昭
忠鎮平將軍。今耿昭忠可攜其祖父骸骨來京。二十
五年三月病卒。

賜祭葬如典禮。謚勤僖。立碑墓道。碑文稱其叅宿衛之
選。服侍禁林。列扈從之班。趨隨鹵簿。星霜游歷。彌昭
謹恪之懷。秩爵加崇。益天靖共之誼云。

耿聚忠字正公。靖南王繼茂第三子也。年十一

世祖章皇帝命入侍

內廷。尋尚柔嘉公主。封聚忠爲和碩額駙。康熙十
五年正月己酉。以

覃恩加太子太保。初聚忠兄精忠統兵駐防閩省。以反
被誅。藩旣廢。所統兵無所屬。十九年閏八月。聚
忠疏言。福建福州府舊有旗兵三千。今調千人
駐防杭州。其親戚及未披甲已退甲閒兵甚多。
應畱住何處。請

旨裁奪得

旨尚書介山率兵還日即攜調杭官兵間散人口畱駐
杭州以馬九玉爲將軍統福州府靖南藩下官兵侍
郎吳努春著於馬九玉未至之先暫行管理二十六
年二月卒

賜祭葬如典禮謚愨敏立碑墓道碑文稱其備宿衛之
選趨踰久効於周廬居思澤之班錫賚頻霑於戚里
星霜洊歷益天靖共夙夜祇承彌加謹飭云

世宗憲皇帝登極追憶

聖祖仁皇帝遺旨有八歲時與耿公主同居慈寧宮之

語推恩錫類

特旨勅建墓碑遣禮臣以太牢致祭焉子五人化祚累
官至鑲藍旗漢軍都統

白清額漢軍正黃旗人初任京職累遷至光祿
卿康熙七年正月授陝西巡撫八年以計典自
陳降四級隨旗行走甘肅巡撫劉斗等據士民
呈懇具疏稱白清額居官清正萬民愛戴乞畱
原任以慰輿情得

旨白清額已經甄別處分本當不復任用近據甘肅巡

撫劉斗等合詞奏稱白清額有益地方兵民數千哀求代題畱任百姓趙璉等奏稱白清額實心實政老稚感悅白清額既爲地方愛戴特順輿情免其處分著復還原任九年三月以病求罷慰畱之是年卒賜祭葬如典禮謚清獻

周全斌漢軍正黃旗人初從海寇鄭氏爲大帥屢犯沿海一帶康熙八年率領戰船來歸

聖祖仁皇帝賜之勅曰朕撫有海內綏安黎庶期與天下共底蕩平未歸則廣示維新既歸則丕彰優異所以戢干戈而鼓忠義也爾周全斌帶領舟艦率衆來歸故加爵賞以示鼓勵茲封爾爲承恩伯爾受茲休命益天忠貞永保寵榮以副朕恩眷至意欽哉尋加散秩大臣九年卒

賜祭葬如典禮謚恪順十一年吏部題請襲爵

聖祖諭曰周全斌勅內雖無世襲爵次但自海外帶領戰船率衆來歸其功甚大作何承襲著議奏尋議覆准襲一次以其子周公仁襲爵

田文鏡漢軍正黃旗人由監生康熙二十二年

任福建長樂縣縣丞。三十一年。陞山西鄉寧縣知縣。四十四年。陞直隸易州知州。明年。內陞吏部員外郎。四十八年。遷刑部郎中。五十一年。改監察御史。五十五年。巡視長蘆鹽政。明年。擢內閣侍讀學士。雍正元年。

世宗憲皇帝即位。差往祭告江瀆之神。尋又

命賑濟山西太原平陽等府。未幾。即

特命署理山西布政使司事務。明年。授河南布政使。署河南巡撫。事閱三月。即實授河南巡撫。兼理河

道。五年。改授河南總督。加兵部尚書銜。明年。

特命兼管山東。改爲河東總督。七年。加太子太保。十年。以疾卒於任。

特遣侍衛奠茶酒。並令開封府立專祠祀之。尋

賜祭葬如典禮。謚端肅。立碑墓道。文云。朕惟國家設官

分職。簡畀首重。夫封疆。臣工殫力抒忱。報稱尤資乎幹濟。其有初終罔間。克勵靖共者。宜備哀榮。以宏獎勸。爾田文鏡。操守潔清。才猷練達。夙承民社。賢聲懋著於循良。繼歷郎官。令望兼司乎風紀。朕誕登寶籙。

念切民依。嘉爾敷陳。用彰明試。兩擢旬宣之寄。旋膺節鉞之加。布惠政以安民。措施有要。凜官箴以率屬。經緯咸宜。東土爲畿輔近區。總制兼兵民重任。特頒寵命。並領青齊。俾掌中樞。晉崇宮秩。懲貪除弊。人知法立如山。律已奉公。僉曰心澄似水。倉儲豐裕。井里乂安。竭心志而不辭。致謀猷之悉善。方資倚毗。忍感凋傷。疊賁殊榮。用申軫念。蔭卹既優於後嗣。肝蠻復煥於專祠。載勒豐碑。錫之嘉謚。於戲。功存保障。彌增眷舊之思。寵被絲綸。永荷飾終之典。昭於奕世。不亦

休歎

蔡良。漢軍正白旗人。漕運總督蔡士英孫也。初任佐領。康熙四十八年。任鎮守福州叅領。五十八年。陞浙江台州副將。雍正四年。調陝西漢中副將。尋陞延綏總兵官。又調江西南贛總兵官。未幾。擢鎮守福建將軍。

陞見

世宗憲皇帝特恩賜孔雀翎。六年。

諭內閣曰。蔡良自用福建將軍以來。訓練約束兵丁。勤

慎得法。福州駐防營伍大為整理。甚屬可嘉。著調補廣東將軍。明年復

諭內閣將軍蔡良。在閩省任內。訓練營伍。和輯兵民。甚為稱職。今調任廣東。覽其陳奏事宜。具見實心辦事。深屬可嘉。伊名下有代父應賠銀兩。前已降旨。寬其限期。今特加恩。免其賠補。以示眷注。特諭。九年。以疾

卒於任。

賜祭葬如典禮。謚勤恪。立碑墓道。文云。朕惟國家鎮撫邊隅。訓飭戎政。端賴壯猷之賢將。式昭秉鉞之宏模。

勤勞既著於生前。寵錫宜優於身後。載稽彝典。廣勵臣工。爾蔡良。端謹持躬。忠勤報國。簡任元戎。以後宣猷閩粵之疆。訓練多方。士備干城之選。輯和有道人。懷挾纊之仁。嘉績孔昭。賢聲懋著。乃倚庇之方切。遽奄逝之忽聞。特沛殊恩。疊加優卹。易名有典。勤恪攸宜。俾告奠於几筵。更鐫銘於琬琰。嗚呼。松楸在望。眷虎帳以興懷。竹帛長垂。被龍章而有耀。承予寵命。綏爾後昆。十年二月。

世宗以京師建立賢良祠。永遠展祀。因

命外省各於省會之地亦建立祠宇。以慰兵民懿好之公。并爲後來居官者之勸。

特旨如將軍蔡良等四人者。猶稱其勤勞王事而歿於官云。

魏經國。漢軍正白旗人。初任熱河把總。康熙四十八年。陞千總。五十年。又陞藩家口守備。尋擢直隸通州副將。又遷江南蘇松等處水師總兵官。五十八年。

命管直隸天津總兵事。尋實授天津總兵官。六十年。陞

湖廣提督。雍正三年。

特命致祭洞庭湖神。尋加太子少傅銜。又調江南松江提督。明年。

陞見

特恩加授尚書銜。並給世襲拜他喇布勒哈番。仍管提督事。五年。緣事降三級。畱任。六年。革去太子少傅尚書銜。並革世職。尋內陞鑲紅旗漢軍都統。七年。

特旨以都統銜管古北口提督事。明年。以疾卒於任。

賜祭葬如典禮。謚僖恪。立碑墓道。文云。封疆奏績。聿推
文武之英。冊府書勲。端重勤勞之佐。生既蒙其渥澤。
歿猶被以殊榮。所以昭國恩。勵臣節也。爾魏經國。恪
恭素著。廉潔堪風。効力行間。冠偏裨而奮武。宣猷闢
外。訓營伍以知方。漢陽之旌節初移。江左之牙幢旋
建。自昔受知。

皇考既顯秩之屢遷。朕因眷念舊臣。復崇階之特晉。嗣
以成勞偶替。每切提撕。用能矢志恪遵。再膺委任。何
期疴疾遽悼。淪徂頒卹典以從優。稽嘉名而肇錫。嗚
呼。豐碑馬鬣長騰。梧楸之光大篆龍章。永護風雲之
色。昭茲奕世。不亦休歟。

劉秉權字持平。漢軍正紅旗人。初從

世祖章皇帝入關。授兵部主事。遷刑部啟心郎。轉僉都
御史。尋擢國史院學士。康熙七年。巡撫廣東。甫
視事。即懲貪墨。禁苛派。革供應。風紀肅然。時方
巡海展界。招徠安插。男女十六萬有奇。墾田二
萬五千餘頃。

聖祖仁皇帝優獎之。十三年。逆藩吳三桂煽亂。平南王

尚可喜。以爵與子之孝承襲之。孝辭。秉權疏言諸逆。鷓張大兵進勦。可喜籌畫周詳。精神強健。請仍令管事。

詔從所請。七月。疏報賊首李唐宗。藏匿偽隆武印勅盤踞永安縣南嶺山巢。值雲貴告變。即乘機嘯黨。蓄謀通逆。隨發兵搜捕。李唐宗勢逼投見。即於軍前正法。遣兵分路搜斬。賊夥殆盡得。

旨下部議敘。十一月。同總兵官王國棟。攻潮州逆鎮劉進忠。破鳳凰洲木城二座。斬偽督金漢臣等。殺

賊五千餘級。積勞卒於軍。秉權在任數載。正己率屬。息事寧民。務持大體。不事煩苛。尤崇理學。重師儒。士風日盛。云。十四年。

賜祭葬。加恤一次。謚端勤。

阿爾泰。漢軍正紅旗人。姓劉氏。福建將軍郎在子也。郎在見世職名臣傳。阿爾泰以順治三年。由廕生任吏部主事。累陞至本部郎中。十二年。兼管佐領。十四年。陞叅領。康熙三年。擢湖廣辰常鎮總兵官。七年。調黃巖鎮總兵官。十三年。逆

藩耿精忠反

詔阿爾泰率兵守浙江寧紹台等處。時耿逆兵至浙江。阿爾泰領兵與之戰。稍却其衆。值我城守叅將武皓潛與賊通。執阿爾泰以降。至福建。耿精忠遣其偽帥曾養性誘之降。阿爾泰不從。大罵不絕口。遂被害。時十四年正月也。事聞。賜謚忠武。予祭葬。廕一子入監讀書。



